

中國方志叢書·華中地方·第九〇六號

據

清·王維新等修，涂家杰等纂
清同治十二年刊本

影印

江 西 省

義寧州志

(五)

成文出版社有限公司印行

義甯州志卷第二十五上

人物志

孝友

唐

沈季詮字子平洪州豫章人少孤事母孝未嘗與人爭皆以爲
快季詮曰吾怯乎爲人子者可遺憂於親乎貞觀中隨母渡
江暴風母溺水死季詮號呼投江中少頃持母臂浮出水上
都督謝叔方且禮祭而葬之

唐書本傳 因學紀聞釋孝經
在醜夷不爭引季詮事爲證

按豫章縣自晉太康厯五代至唐貞元始改分甯縣蓋唐
初貞觀時尙屬豫章也其間四百餘年典籍無稽人物寥

寥或混入他縣者尤有待於蒐羅

宋

黃薰字伯仁山谷姪孫居彭姑市之東溪事母至孝乾道間洪水暴漲室與母柩俱漂沒朝夕號哭欲俱亡徒跣至武甯蒿港聞數柩隨流而下惟一柩回流入港徘徊不去居民陳姓者見之惻然繫置於桑間以土覆之薰求之果得舁歸葬焉黃用中廣濟簿尉介之子也宋末亂起父鄉居帥鄉人守龍安山砦北兵至砦箝面如蝟不屈死之母劉氏被掠用中乘間逸得不死及壯求母四方誓不見母不復還逾十年得諸京師遂與俱歸人皆稱爲黃孝子可謂忠孝一家矣

元

夏經孫字權可縣市人隱居不仕其先世稱巨族博通經史有聞於時翰林修撰余貞嘗師事之教人以孝弟忠信爲本事父竹澗公溫清起居必謹躬親調膳父歿執喪盡哀祭葬如禮有司上其事於省時余公修宋遼金三史以精通史學薦之及召而卒

余貞字復卿良肱之裔登進士歷官棗陽尹所至有善政事父至孝及居鄉四方來學者不遠千里後至元庚辰秋召爲翰林修撰修宋遼金三史史成即乞歸養中途聞父喪慟哭徒跣數百里居喪以禮旋疾卒

王仕俊奉鄉人至正間立寨保障鄉民賴之與兄通兩分父產
後父生庶子郁慮業析無給將不育俊曰難得者人財何恤
焉以己業分之郁始獲存鄉稱種德云

明

黃咀高市鐵爐巷人父伯羲洪武間任大使以事逮繫法曹論
死咀鎖頸擊登聞鼓願以身代詞極懇切上疑其詐並付法
曹鞫之事未上父子俱死於獄鄉里哀之

周銘字仲彝號可庵幼穎敏過人通詩書春秋三經痛父死絕
域有司舉孝廉不就家居教授及門之士多所成就黎文僊
公其一也兒時送父之官別於紫石嶺暨長經其地必慟哭

良夙乃去母劉氏年九十餘嗜醕醢每饌必設匕就寢復請更進以爲常同母弟二人教愛備至性不喜釋老冠昏喪祭多用文公家禮歲時伏臘惟節儉爲兢兢里俗爲變少年駘蕩者私相語曰母令可庵先生知之素爲人敬憚如此以齒德舉鄉飲大賓嘗自言曰吾無過人凡所爲皆僅可而已因自號可菴作可菴說以自況學者遂稱爲可菴先生所著有效顰和梅花百詠詩集藏於家卒年七十有五以孫季麟貴贈都察院右副都御史

按周南山集可菴行狀有云所取友皆問學老成端謹古樸之士如西安推官王公琬江陵訓導匡公泰儒士冷公

清士人陳公郇兄弟皆知己也賡和詩詞最多至今人能
傳誦景泰天順成化間邑大夫禮請纂修縣志與儒士黃
公邦節冷公清陳公玦同事一以至公是非不肯阿於人
鄉中富豪有欲相干者毅然不許今考舊志所載惟陳郇
見於鄉賢王琬匡泰見選舉冷清黃邦節陳玦皆失考意
必當時隱德君子其不傳爲可惜也故附著之

周淑材高市丁田里人生即失恃嫡母古氏乳之父仲舉蚤世
材事母孝養備至母老不能起居夫婦扶攜向煖進食妻伴
母寢供溺器者二十五年母九十五歲卒材哀毀成疾或勸
就醫曰吾幸從先母地下足矣竟不藥而終

陳鳳歧字庭安郇長子也幼有器局從鄉先生周銘學立身大節性孝友母病足瘍多方購醫治之康復乃已親歿擇地葬堪輿家謂地缺左沙將不利於長歧長也乃正色折之卒葬焉仍植紫荆樹於墓前以示諸弟期如田氏友愛成化壬辰劇寇羅萬珪聚眾爲患鄉邑震恐侍郎原公傑檄歧督捕歧密購敢死士躡蹤至湘湖縛其渠魁以歸原深嘉禮之

查昂已舊仲子也幼穎異父授以詩書二經悉通大義旣長受業於國子祭酒顧安胡公之門公大奇之入困舉子業遂隱江湖樂與縉紳諸公游好吟咏嘗於維揚登騎鶴摘星樓有登樓長嘯空彈鋏騎鶴憑空可摘星之句善談時務因作鹽

箴議數千言上之鹽臺皆切時弊竟阻弗行乃浩然歎曰進
無以益於時退而青山白石甯我異耶遂卜築於修江終老
焉性孝友每事務爲悅親推所有以益兄弟弗問也里有誣
其兄弟死獄者力爲白之其人終身愧服至於輕財樂施親
賢友善鄉評重之卒稱孝友先生

查孟泰號養心義民恕已側室謝氏所生嫡母王氏卧病神氣
昏迷經二旬孟泰躬侍湯藥寢食俱廢父以憂其母故亦疾
時孟泰年十九倉皇無計虔禱於神遂剗股肉和藥以進王
氏飲而食之寐忽夢神語曰家有孝子爾疾必痊王氏醒尋
語夫夫聞喜躍而起病皆瘳郡守黃公親題孝茂椿萱而以

其事上聞部議給以七品冠帶匾旌純孝格天併書孝子第
以表其閭從兄孟富亦以刲股療親疾都憲周南山爲作懇
孝堂記

周彥中諱權別號宜齋幼聰敏從仲父僖敏公學業成而巾廢
性孝友事父母無故不離左右及襄大事一遵家禮兄柏爲
鄉人所誣代之就繫第梧疾躬親藥物庭無間言祖塋侵陵
於鄉豪訟繫於獄積歲而得直鄉人義之鄰有忿爭得一言
居間立解其人餽謝卒不受或加以橫逆不與校卽有急來
告復爲營解之每市田宅必厚其直人皆服其德量歲蝗率
鄉民祈禱時有羣雀擁籃輿啄蝗食之人以爲異生子期雍

成進士歷官大司寇直聲惠政錫然有聞皆庭訓之遺也治家嚴肅有法雖童僕無敢違尺寸卒年七十有六贈刑部尚書所著有宜齋稿藏於家大學士李文正公表其墓曰迹公之才識行誼俾其踐仕途登廊廟其所設施必有大過人者顧乃鬱而不舒君子不無遺憾焉嗟夫不於其身必於其子孫斯彥中之謂乎

陳孔塋泰鄉人父煥游太學祖母高氏患癰家失火塋與母冷氏一物無所取急赴烈焰中負高出得免衣髮盡焦高氏壽終八十六祝曰汝母子善事我必有善報云

查景元字立卿由庠生入南雍以父仲道諫南巡幾斃杖下守

杭州抑織造中貴誣謫逮官卒居常痛焉遂無宦情孝事母
方宜人義於賑饑急於公賦以例授兵馬指揮卒年七十有
八

陳以相號軻軻存之次子天性純粹不事矯飾舞象時以孝著
聞閭里父卒哀毀骨立絕口不道家產事生母孫氏年四十
依戀如孩赤母病親侍湯藥不假僕妾醫者謂鶴毛扇風不
傷人不憚數百里製之母卒哀痛殞而復甦者再每當生忌
不御酒肉思慕如初督學黃公汝亨張公景元陳公懋德三
旌優行知州李公友梅額其堂曰孝友第窮年誦讀屢困棘
闈售而復落義命自安善草書精詩畫通素問常施藥餌以

活人有友私寄四十餘金託以後事踰年友亡相出其物原
緘如故伊子不知也其潛德類如此卒年五十六
盧尙庭字孤松仁鄉盧源人孝事父母出於至性怒則跪地受
杖疾則籲天代死母歿奉母柩葬水源西園離家十二里結
廬墓側三年哀痛悲號勿能已常以手捫墓石石爲之凹至
今指痕在焉疾亟遺命從母葬水源蓋雖死不忍離其親也
萬曆二十四年州庠生周存仁徐以禮余學申陳以泰周希
令等呈明當事請旌詔每年給粟二石帛二疋優恤時巡按
江西監察御史史布政司分守道叅政朱按察司分巡兵備
道史區旌其門曰孝行曰柏臺獎孝其長孫應秋由拔貢任

浙江嵊縣令

盧氏舊譜及諸紳舊呈

查振邦字在輿號北阿州治鸚鵡橋人明眉州府判仲儒之裔蚤失怙恃時值兵火頻仍三弟皆幼有在襁褓者振邦提攜鞠育備極艱辛乃至成人又爲教讀婚配宗族鄉黨無不稱之他如濟急難全婚姻修治橋梁道路力行至老弗倦故今子孫蕃衍蜚聲庠序尤徵厚德之報云

周必顥字宗仁先鰲之子天性醇謹惻惻若不勝衣乙酉臘月賊夜寇城父母年老不能行顥謂仲弟曰汝尙無嗣謂季弟曰汝有子亦稚宜急去我有二子當護父母頃賊至索金不已燔背斷股其母泣救受刃顥執刃泣曰苟全吾親吾命奚

恤賊不爲動扭至門闕碎腦折脰以死

陳嘉瑤字容玉蔚菴長子瑰異不凡三歲能識字七歲問父曰生人者誰曰父母曰初生人者爲誰父大奇之十歲能屬文學憲侯公峒曾面試補弟子員成童克順二人無他慕之酉賊兵持刃向母瑤給以金母脫賊怒受傷而卒

姚修玉字五瑞明敏勤學純孝性成年十五值闖寇衝州執父拔刃以索金玉恐父爲寇傷躍出跪地願以身代約購馬以贖寇諾釋其父待二日父得馬往贖其子牽過賊營爲別軍搶去寇以玉言爲欺執至白土殺之復魁昇歸調護一月而卒葬七都林橋

夏仲宣性至孝母汪氏嘗割股以療姑病及姑歿夫以哭母故
暴病汪氏又割股以愈之未幾仲宣父歿汪氏守節數十年
仲宣敬養惟謹旣而母老病劇醫藥弗效仲宣乃焚香籲天
割左股肉和藥湯以進母病遂瘳仲宣因著懷清錄余應荃
爲之序稱夏孝子云

蝶莊集

國朝

溫奇梧捷生之子事孀母至孝乙卯賊逆攻城母涂氏攜女
菊貞走高堰賊勢猖獗中途冲散潛藏於南始橋深溝梧
至高堰問母不見搶地呼天必欲尋母眾止其行皆曰滿
山是賊何處可尋梧曰我若尋母即遇賊亦無恨奮然沿

山喊哭至張義坑賊執而殺之

周京字同文必強之子定省無懈咸稱養志割股療父病後
被闖獲給賊收父自墮懸崖得不死事聞各憲屢行優旌
子孔德候選縣丞子角廩貢兄弟有五聯鑣庠序

陳欽振字耿北以納幼子少失怙遵母訓兩遇寇兵冒刃救
母卒獲俱全恤孤贈殯濟人澤物各憲廉其賢題其門曰
孝友克全卒年七十子嘉宏孫懋彰有聲膠庠

羅錦文甯之簞人也僦居我井巷熒然一身析薪養母每得
值即市菜肉歸治饌以進歲時不輟母年九十錦文亦五
十餘矣依依孺慕如初每偶不懌則蹲地作班舞狀解頤